

P

Kalaallit Nunaanni eqqartuussisarnermik inatsisip allanngortinneqarnissaanut inatsisissatut siunnersuutip (Pinerlunnernut Immikkut Isigisarialinnut Nuna tamakkerlugu Immikkoortortap Kalaallit Nunaannut piginnaatitaanera il. il.) kiisalu pillaasarnermik inatsisip, eqqartuussisarnermik inatsisip, aningaasanik malunnarunnaarsaasarneq pillugu inatsisip aamma inatsisit allat assigiinngitsut pillugit inatsisip allanngortinneqarnerata ilaanik Kalaallit Nunaannut atuutilersitsinissamut peqqussutissatut missingiut pillugit Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.
Aatsitassanut Inatsisillu Atuutsinneqarnerannut Naalakkersuisumit saqqummiunneqartoq

pillugu**Inatsisinut Ataatsimiititaliap****siunnersuutip aappassaaneerneqarneranut****ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, formand
Inatsisartunut ilaasortaq Paneeraq Olsen, Naleraq, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Harald Bianco, Inuit Ataqtigiit
Inatsisartunut ilaasortaq Asii Chemnitz, Inuit Ataqtigiit

UPA2023-mi 2. maaji siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Suliassat aningaasanik malunnarunnaarsaasarnernut, peqqarniisaarniarnernut aningaasalersuisarnernut, aningaasatigut pinerluttuliornernut il. il. tunngasut paasiniaanerni Kalaallit Nunaanni Politiinut ikiunnissamut Pinerlunnernut Immikkut Isigisarialinnut Nuna tamakkerlugu Immikkoortortaq¹ piginnaatinneqassanersoq inatsisissatut siunnersuutip

¹ I forbindelse med den danske regerings indgåelse af flerårsaftalen for politiets og anklagemyndighedens økonomi 2021-2023 blev National Enhed for Særlig Kriminalitet etableret i Danmark med virkning pr. 1. januar 2022.

pingaarnertut imaraa. Tamatumunnga ilaatigut tunngaviuvoq suliassanik taamaattuni paasiniaanermi inuiaqatigiit kalaallit Danmarkimisut sulinneqarnissaasa qulakkeerneqarnissaanik kissaateqarneq.

Inatsisinik unioqquitsinerup immikkut ittumik annertussuseqarnera, aaqqissuussaasumik pinerluuteqartarnernut ilaanera, nunani allani inatsisit atortinneqarnerannut oqartussanik suleqatiginninnissamik kinguneqartussaana, immikkut issusilimmik periaaseq atorlugu pinerluutigineqarnera imaluunniit allatut immikkut illuinnartutut inatsisinik unioqquitsisoqarnera, pissutissalimmik ilimagisariaqartillugu, suliat isumalluutinik atuiffiunerpaat aamma assigiinnigitsunik katitigaanerpaat ilaat Pinerlunnernut Immikkut Isigisarialinnut Nuna tamakkerlugu Immikkoortortap misissoqqissaassallugit pillaatissiissutigineqarnissaallu suliarissallugu siunertaraa. Suleqatigiinnermi oqartussaasut peqataasut pingaarnertut tassaapput politiit, akileraartarnermut ingerlatsivik aammalu aningaasatigut peqquserluutinik malunnarunnaarsaasarnermut suliassaqarfimmi nakkutilliinermut oqartussaasoqarfiit. Suleqatigiinneq ilaatigut pinerlunnerit ingerlanneqartut sukkanerusumik paasineqarnissaannut, unitsinneqarnissaannut aammalu pillaatissiiniarluni suliassanngortitsinermut iluaqutaasinnaavoq, soorlutaaq suliffeqarfiit aningaasersuineramik ingerlatsisut aningaasatigut peqquserluutinik malunnarunnaarsaanerit il. il. pitsaaliorniarlugit suliniuteqarnerannik patajaallisaasussaasoq.

Kalaallit Nunaanni eqqartuussisarnermik inatsimmi ilaatigut nutaatut § 62 h-p ilanngunneqarnissaa inatsisissatut siunnersuut aqquqigalugu siunnersuutigineqarpoq, tassuunakkullu Pinerlunnernut Immikkut Isigisarialinnut Nuna tamakkerlugu Immikkoortortaq Kalaallit Nunaanni sulianik ingerlatsinissamat piginnaatitaallissaaq

Aammattaaq inatsimmi tassani nutaamik § 62 i-mik ilanngussisoqarnissaa siunnersuutigineqarpoq, tamatumalu kingorna Pinerlunnernut Immikkut Isigisarialinnut Nuna tamakkerlugu Immikkoortortap ataani ajornaatsumik sulinissamat suleqatigiinneq, Danmarkimi pilersinneqartoq, aamma Kalaallit Nunaanni atuutissalluni.

Inatsisissatut siunnersuutip saniatigut inatsiseqarnermut ministeriaqarfiup peqqussutikkut pillaaasarnermik inatsisip, eqqartuussisarnermik inatsisip, aningaasanik malunnarunnaarsaasarneq pillugu inatsisip aamma inatsisit allat assigiinnigitsut attuumassuteqartutigit allanngortinneqarnissaannut inatsisissatut missingiummik suliaqarsimavoq. Tassungalu ilaatigut ilaapput kinguneqaataasumik allannguutit arlallit kiisalu aningaasanik malunnarunnaarsaanerit pillugit Aningaasanik malunnarunnaarsaasarnermut allatseqarfimmut nuussinernik immikkut pasinartunik nalunaarutiginnittarnermut fast trackimik (sukkanerusumik) aaqqissuussineq. Aamma siunnersuutigineqarpoq suliffeqarfimmut aamma inunnut aningaasanik malunnarunnaarsaasarneq pillugu inatsimmi ilaatinneqartunut nipangiussisimasussaatitaaneq atuuttoq annertusissallugu oqartussaqaarfinni atorfilittanut

tamanut atuuttussanngortillugu kiisalu paasissutissat suleqatigiinnermut atatillugu tiguneqartut pillugit nipangiussisimasussaatitaanermik immikkut ittumik eqqussisoqarnissaa, suleqatigiinnermi isertuussinissaq pisariaqartoq isumannaarumallugu. Tamatumunnga tunngaviuvoq suleqatigiinnermi paasissutissanik ingerlatitseqqiisinaanerup isumannaarneqarnissaanik kissaateqarneq, tassunga ilagitillugit paasissutissat isertuussat, aningaasanik malunnarunnaarsaasarnerit aammalu peqqarniisaarniarnernut aningaasalersuisarnerit pitsaaliorniarlugit aamma akiorniarlugit suliaqarnermut pingaaruteqartut.

Siunnersuutip Inatsisartuni siullermeerneqarnera

Inatsisissatut siunnersuut siullermeerinninnermi akuersaartumik pissuseqarfigineqarpoq, ataatsimiititaliamillu suliarineqartussanngorlugu innersuunneqarluni.

Tusarniaanermi akissutit

Siunnersuut piffissami 2023-imi 9. januarimiit 6. februarimut tusarniutigineqarsimavoq, inatsisissatulli siunnersuummi allassimavoq tusarniaaneq oqaaseqaateqarnissamik tunngavissiisimangitsoq, taamaammallu tusarniaanermut nalunaarsuut oqaasertalersugaq suliarineqarsimangilaq.

Tusarniaanerup ingerlanneqarnera pillugu ataatsimiititaliaq oqaaseqaatissaqanngilaq.

Ataatsimiinnerit

Siunnersuummi allassimavoq, matumani siunnersuutigineqartoq Kalaallit Nunaanni Politiit kissaateqarnerat tunngavigalugu saqqummiunneqartoq. Tamassumap itisilerneqarnissaa siunertaralugu ataatsimiititaliap Politiit Pisortaata ataatsimeeqatigaa.

Politiit pisortaata paasissutissiisutigaa ukiut 30-t matuma siorna pinerluutigineqarsinnaasimangitsut ullumikkut pinerluutigineqartalersimasut politiit misigineqartartoq. Tamatumani pineqarput assersuutigalugu suliata immikkut pisariusut, aaqqissuussaasumik pinerluttuliornerit, suliffeqarfiit inerteqqaasumik isumaqatigiissusiortarnerat, immikkoortortat akimorlugit suliassat, qarasaasiakkut pinerluttuliornerit, suliata isumapiloqarneq tunngavigalugu tatiginnilersitsiniaanikkut meeqqat kinguaassiuutitigut atonerlunneqartut assinginik siaruarterinnermut tunngasut il. il.

Politiit pisortaata paasissutissiisutigaa, paasinninnini naapertorlugu suliassaqarfiit pisariusorujussuit malinnaaffiginissaannut immikkut ilisimasallit pisariaqartinneqartut aaqqissuusaanikkut Kalaallit Nunaanni, Savaliummiuni aamma Danmarkimi politeeqarfiit immikkoortortaanni pigineqannginnerannik nassuerutiginninnerusoq. Kalaallit Nunaanni

Politiinut tunngatillugu nassuiaatigaa, sulisut amerlassusiat pissutigalugu immikkut piginnaasaqarfissanik eqqortunik pilersitsinissaq periarfissaqanngitsoq.

Illuatungaatigullu Pinerlunnernut Immikkut Isigisarialinnut Nuna tamakkerlugu Immikkoortortaq suliaasaqarfimminni qaffasissumik immikkut ilisimasaqartunik 1.000-t sinnerlugit sulisoqarpoq. Taamaammat taakku akisussaaffiannut Kalaallit Nunaat ilanngunneqarpat naleqartorujussuussaaq.

Ataatsimiititaliap siunnersuummik suliarinninnera

Kalaallit Nunaanni Politiit kissaateqarnerat tunngavigalugu inatsisissatut siunnersuut pingaarnertut saqqummiunneqartoq aammalu suliat immikkut ittumik pisariusut ilaatigut nunatsinni aningaasatigut pinerluttuliornernut tunngasut paasineqarnissaannut eqqartuussivikkullu malersorneqarnissaannut periarfissat nukittorsarneqarnissaat siunertaasooq ataatsimiititaliap maluginiarpa.

Aningaasatigut pinerluttuliornerit, aaqqissuussaasumik pinerluttuliornerit qarasaasiatigullu pinerluttuliornerit pisariunerpaat akiorniarlugit suliniuteqarnermut siunnersuut nukittorsaassaaq. Assersuutigalugu suliani aningaasanik malunnarunnaarsaanermit, peqqarniisaarniarnernut aningaasalersuisarnernut, aaqqissuussaasumik aanngajaarniutilerisoqatigiinnut assigisaannullu tunngasuni.

Aningaasanik malunnarunnaarsaasarnerup siunertaa tassaavoq, iliutsimut pineqaataasinnaasumit iluanaarutitik qulakkeeriniarneq. Aanngajaarniutitik niuernermit, inunnik eqquissuinerit, sakkunik eqquissuinerit, ujaajaanermit aningaasat pigisalluunniit naleqartut pissarsiarineqarsinnaapput imaluunniit assersuutigalugu allap pianik imminut paarititanik peqquserluuteqarnikkut, akileraarutitik sumiginnaanermit, aningaasatigut sallulluni peqquserlunnermit, iluanaarniarluniluunniit peqquserlunnermit aamma iluani inissisimasumik suleqateqarnikkut pissarsiarineqarsimasinnaapput. Iluanaarutit iliutsimit pineqaataasinnaasumit pissarsiarisimasat atorsinnaajumallugit pinerluttuliorsimasut inatsisitik malinnillutik aningaasarsiarisimasuusaartariaqartarpaat. Taamaammat iluanaarutit inertequtaasumik pissarsiarineqarnikut suminngaanneernerit toqqortertariaqartarlutik. Tamanna assersuutigalugu aningaasat suminngaanneernerit ersernerlutsilerneratigut imaluunniit aningaasat suussusaat allannortillugit soorlu allamiut aningaasaataannut aggartillugit pisinnaavoq. Aamma iluanaarutit maluginiarnerunneqartussaajunnaarlugit allamut nuutsinneqarneratigut pisinnaavoq.

Aningaasanik malunnarunnaarsaasarneq nunarsuarmi ajornartorsiutaavoq ajornartorsiutaaleriartuinnaarlunilu, aqutissani assigiinngitsuni nunallu killingi akimorlugit pisartooq. Taamaammat nunami aalajangersimasumi aningaasat qanoq amerlatigisut malunnarunnaarsarneqartarnersut uuttoruminaapput. 2011-mi NP-mi ilisimatusaatigineqartumi

United Nations Office on Drugs and Crime²-p (Nunat Peqatigiit Aanngajaarniutitut Pinerlunnernullu Allaffeqarfiata) missiliorpaa, nunarsuaq tamakkerlugu nioqqutissat tamakkerlugit nalingisa (BNP) 2,7%-ii malunnarunnaarsarneqartartut. Tamanna Danmarkimiinnaq 68 milliard koruuninik naleqartuq missiliorneqarpoq³.

Pinerluttartut periutsitigut eqqarsallaqqissiaruinnarneranni oqartussanut namminersortunullu pinaveersaartitsinermik akiuiniarnermillu suliaqartunut piumasaqaatit annertuneruleriartorput. Aningaasatigut pinerluttuliorneq aamma malunnarunnaarsaasarneq ajornartorsiutaavoq annertusiartuinnartoq aamma Aningaasanik malunnarunnaarsaasarnermut allatseqarfimmut nalunaarutigineqartartut amerliartupiloorsimanerat takuneqarsinnaavoq⁴.

Antal underretninger modtaget	2016	2017	2018	2019	2020	2021	Total
Total	18.671	24.911	35.769	53.481	73.447	70.449	276.728

Aningaasanik malunnarunnaarsaasarnerp kingunerisai annertupput. Assersuutigalugu anngajaarniutunik niuernermit aningaasannorlugit tigusat nunap killinganit eqqunneqaraangata tuniniaasullu aqutugalugit inerteqqutaangitsutut suliffeqarfikkut ingerlateqqinneqaraangata pinerluttuliortut inunnut aanngajaarniutunik atuisunut ajoqusiillutillu suliassaqaarfinilu malunnarunnaarsaaffiusuni unammillerteriinnermut ajoqusiisarput aamma innuttaasut akileraarutiniit akitsuutiniillu iluanaarutissaannik arsaartarlugit. Pinerluuteqartut akileraartaratik aningaasanik malunnarunnaarsaallutik akisuunik nalunaaqutarsigunik, biilisigunik, illusigunik imaluunniit suliffeqarfissigunik naalagaaffiup isertitai inuiaqatigiit iluaqutigisinnaasaralutik ikinnerulissapput. Tamanna nunani tamani innuttaasut aningaasassaralutik tillinniarfiusuni atuuppoq. Taamaammat aningaasanik malunnarunnaarsaasarnermut akiuiniarnermik sunniuteqarluartumik sapinngisamik nunat amerlasuut suliaqarnissaat pingaaruteqarpoq.

Aningaasanik malunnarunnaarsaasarnerp saniatigut kingunerisinnaasaa tassaavoq, politikikkut aaqqissusaanerup pisortanilu ingerlatsiviit inunnik suliffeqarfinillu aningaasanik malunnarunnaarsaasartunik nakkutilliinermik, tigusarinninnermik pineqatissiissutigineqarnissaannillu suliaqartuusut tatigineqarneranut innarliineq. Aningaasanik malunnarunnaarsaasarneq inatsisitigut pineqaatissiissutigineqarnissaanut pillaaataasinnaanissaanullu naammattumik suliniutigineqanngitsutut innuttaasunit isigineqarpat, naapertuuttumik ingerlasoqannginneranik misigilersitsisinnaavoq.

Akerlianik pinerluuteqartunut aningaasanik malunnarunnaarsaanissaq ajornarnerutillugu

² [United Nations Office on Drugs and Crime \(unodc.org\)](https://www.unodc.org/)

³ [risikovurdering_webtilgængelig_v1.01.pdf \(anklagemyndigheden.dk\)](#)

⁴ Antal underretninger sendt til Aningaasanik malunnarunnaarsaasarnermut allatseqarfik fra 2016-2012:

[Normal.dot \(anklagemyndigheden.dk\)](#)

pinerlunnermik ingerlatsiinnarnissaq pilerinarunnaariartuinnassaaq. Taamaammat tamassumap inatsisitigut suliaasaqarfiup nukittorsarnissaa pingaaruteqarpoq, inatsisitigut aningaasanik malunnarunnaarsaasarneq, peqqarniisaarniarnermut aningaasalersuisarnerit il. il. pinaveersaartillugillu akiorneqarnissaannut inatsisitigut suli sinaakktissaaqartoqarniassammat.

Inatsisissatut siunnersuutip kingunerissavaa, Pinerlunnernut Immikkut Isigisarialinnut Nuna tamakkerlugu Immikkoortortap Kalaallit Nunaannut suliaasanut piginnaatinneqalenera. Immikkoortortaq sulianut pisariusunut isumalluutinillu atuiffiusuni paasiniaanermut pillaatissiissutigineqarnissaannillu suliaqarnermut immikkut ilisimasaqartuummata, aningaasanik malunnarunnaarsaasarnermut, aningaasatigut pinerluttuliornernut il. il. tunngasunik pinaveersaartitsinissamut akiuiniarnissamullu suliaqarnermi sunniuteqarluartumik atortussatut nalilerneqarluni.

Inatsiseqarnermut ministeriaqarfik pillaasarneq pillugu inatsisip, eqqartuussisarnermi inatsisip, aningaasanik malunnarunnaarsaasarneq pillugu inatsisip aamma inatsisit allat assigiinngitsut attuumassuteqartutigit allanngortinneqarnissaannut inatsisissatut missingiummik suliaqarpoq. Nuussinernut annertuunut imaluunniit nuussinernut immikkut pasinartunut Aningaasanik malunnarunnaarsaasarnermut allatseqarfimmut nalunaarutinut tunngatillugu fast trackimik aaqqissuussamik pilersitsinermik, tassa arsaarinnittoqarnissaanik tunngavissaqarnerup paasiniareernissaanut nuussinermik unitsitsigallarsinnaanermik⁵ pisussaaffeqarnermut tunngavoq.

Aningaasanik malunnarunnaarsaasarnermut allatseqarfik aningaasanut tunngasunik isertortukkut paasiniaasartoqarfiuvoq, taamaammallu aningaasanik malunnarunnaarsaasoqarsinnaaneranut peqqarniisaarniarnernullu aningaasalersuisoqarsinnaaneranut paasissutissanik tigooraaneq misissuinerlu taakkulu paasissutissat qanoq atorpeqarsinnaanerinik nalilersuisartunut oqartussanut piginnaatitaasunut ingerlatitseqqinneq suliaannut qitiullutik. Inuit suliffeqarfiillu aningaasanik malunnarunnaarsaasarnermut inatsimmut ilaasut tamarmik aningaasanik malunnarunnaarsaasoqarsoritillutik imaluunniit peqqarniisaarniarnernut aningaasalersuisoqarsoritillugu Aningaasanik malunnarunnaarsaasarnermut allatseqarfimmut nalunaaruteqarnissaminnik pisussaaffeqarput.

Inatsimmut allannguutissap peqqussut ilanngullugu siunnersuutigineqartup pitsaaqutai tassaapput maani nunami sulianut immikkut pisariususeqartunut ilaatigut aningaasatigut pinerluttuliornermut tunngasunik paasiniaanermi pineqaatissiissutigineqarnissaannullu suliaqarnermi periarfissat pitsanngorsaavigineqassaat. Inatsisissatut siunnersuutip kingunerissavaa, Pinerlunnernut Immikkut Isigisarialinnut Nuna tamakkerlugu

⁵ Det fremgår af forslagets resumé, at transaktionen kan fastfryses indtil der senest ved udgangen af den efterfølgende bankdag er modtaget en tilbagemelding fra sekretariatet.

Immikkoortortap, sulianut pisariusunut isumalluutinillu atuiffiusuni paasiniaanermut pillaatissiissutigineqarnissaannillu suliaqarnermut immikkut ilisimasaqartuusut, Kalaallit Nunaannut suliassanut piginnaatinneqalenera. Tassunga tapiliullugu Aningaasanik malunnarunnaarsaasarnermut allatseqarfiup fast trackimik aaqqissuussaq aningaasanik malunnarunnaarsaasarnermut, aningaasatigut pinerluttuliornernut il. il. tunngasunik pinaveersaartitsinissamut akiuiniarnissamullu suliaqarnermi sunniuteqarluartumik atortussatut nalilerneqarpoq.

Inatsisissatut siunnersuutip aamma peqqussummut missingiut itigartinneqarnerisa kingunerissavaa, paasiniaanermik pineqaatissiinermillu suliaqartarneq Kalaallit Nunaanni Politiit kisimiillutik kivissagaat. Inatsisissatut siunnersuut sioqqullugu Kalaallit Nunaanni Politiit suliassaqrfinni suliaqartarnerminnut ikiorneqarnissamik pisariaqartitsinerminnik erseqqissaareermata, sulianut paasiniaanissamut aamma suliat pineqaatissiissutigineqarnissaannut suliaqarnissamut inatsisissatut siunnersuutip itigartinneqarnerata isumalluutit naammakkunnaarnerannik kinguneqassasoq ilimagineqassaaq, taakkumi suliat pisariunertillu isumalluutinik atuiffiunerpaanertik ilisarnaatigimmassuk. Taamaalilluni Kalaallit Nunaat taakkununga pinerluttuliornernut illersorneqarnera ajorseriassaaq aammalu immaqa Kalaallit Nunaata taamaattunik pinerluuteqarfiusinnaanissaanut pilerinartunngortitsissalluni, paasineqarnissap kiisalu inatsisitigut malersorneqarnissap ilimanaataa annikinnerummat.

Siunnersuutip aningaasatigut kingunerisassai

Siunnersuutip piviusunngortinnerani aningaasatigut kingunerisassai siunnersuummut nassuiaatini nalinginnaasuni allaaserineqarput. Tassani allaqqavoq, suliassaqrifik naalagaaffiup oqartussaasuisa ataaniittoq aamma Pinerlunnernut Immikkut Isigisarialinnut Nuna tamakkerlugu Immikkoortortaq pilersinneqarmat isumalluutit pisariaqartinneqartut ukiunut arlalinnut isumaqatigiissummi ilanngunneqareersut.

Aammattaaq allassimavoq, siunnersuut namminersorlutik inuussutissarsiutilinnut imaluunniit innuttaasunut aningaasatigut allaffissornikkullu kinguneqartussaanningsutut naatsorsuutigineqartoq.

Ataatsimiititaliap inassuteqaatai

Tamanna tunngavigalugu siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Anders Olsen
Siulittaasoq

Paneeraq Olsen
Siulittaasup tullia

Harald Bianco

Mala Høy Kúko

Asii Chemnitz Narup